

CULTURA/2

Na neva parbuda per la Majon di Fascegn

L'Istitut Cultural Ladin presenta n nef logo e l renovament de la parbuda istituzionèla. Va inant l projet »Do l vièl del saer« coi recorc de Lis dal Vera



L staff de la Majon di Fascegn col nef logo.



Sal Vera l é stat portà dant l spettacol teatrèl su la vita de Lis.

L'atività de la Majon di Fascegn va inant ence tel an 2022 con l projet »Do l vièl del saer«. Per endrez de la Biblioteca ai 11 e ai 13 de firè vegn portà dant amò doi outes l spettacol de teater sun Pèr Frumenzio Ghetta de Martin che é stat adata a la paladina. Te chesta ocajion vegn prejentà ence l prum numer de na neva regoeta editorièla dal titol »Jent de Fascia« dedicà apontin a Pèr Frumenzio Ghetta.

De otober enveze, te la bela cornisc del Vera, la compagnia »Trei carc de ora« met dant la raprezentazion »Do l vièl del saer – Lis da Vera vel te dir vèlch« su la vita e i recorc de Lis dal Vera, na femena simbol de duta la femenes da zacan, ejempie de struscies e de fadies.

Endèna via per dut l an taca a moscèr si fruc l rebranding, l renovament de la parbuda istituzionèla. L Istitut Ladin prejentà sie nef logo, na M che moscia doi figures che se dèsc la man, che recorda la forza del dialogh e de la condivijion. Sul troi del nef logo e de la neva parbuda la Majon di Fascegn endreza duta na lingia de ativitàdes: video, banner, colaborazions col teritorie.

A la fin de november l Museo Ladin prejentà ne neva proponeta tecnologica, pissèda per arvejinèr picoi e gregn a noscia storia veiora. Se trata de n jech virtuel con joystick e visor tecnologich che fèsc descorig l sit preistorich sora Mazin, l Dos di Pigui.

L lurier de la Majon di Fascegn va te la direzion de na colaborazion

strenta col teritorie e l ent vegn cernù per n muie de scomenzadives, mostres e per prejentazion de libres.

Duta l'atività del 2022 vegn prejentèda a la radunanza generèla dai 17 de dezember olache vegn metù al luster en particulèr la colaborazion con FBK, la Fondazione Bruno Kessler, da chela che l é nasciù l video »Monologhes« e l projet de AI (intelligenza artifizielà) »Tone« col joen Marcus Vukojevic da Dèlba. Va inant ence l lurier sui dizionères VOLF e DILF.

La Biblioteca de la Majon di Fascegn à dat fora l nef calandèr ladin metù ensema con la colaborazion de la Cèsa de Paussa e l calandèr da desch fat ensema ai scolees de la Scola de Fascia.